

Sakkutuujusussaaneq pillugu inatsisip allanngorneratigut inatsisit aalajangersimasut Kalaallit Nunaannut atuutilernissaat pillugit kunngip peqqussutaatigut atuutilersinneqarnissaa Namminersorlutik Oqartussat akuersaarsinissaat pillugu Inatsisartut aalajangiiffigisassa

(Nunanut Allanut Nukissiuuteqarnermullu Naalakkersuisoq)

Saqqummiussissut

(Nunanut Allanut Nukissiuuteqarnermullu Naalakkersuisoq)

Siullermeerineq

Naalakkersuisut sinnerlugit, nuannaarutigalugu, aalajangiiffigisassatut siunnersuut sakkutuujusussaaneq pillugu inatsisip allannguutaanut aalajangersimasunut tunngasoq saqqummiuppara.

Aalajangiiffigisassatut siunnersuutip siunertaraa Illersornissaqarfiup iluani sakkutuujusussaataasut tamarmik assigiinnik atugaqarnissaasa qulakkeerneqarnissaa.

Kunngip peqqussutaa taaguutip ”innuttaasunik illersornissaqarfik”-immik ”annaassiniarnermut upalungaarsimaneq”-mut allannguineramik nassataqarpoq.

Inatsisip allanngortinneqarnerata kingunerisaanik sakkutuujusussat ilaat sakkutuujusussaataanermit inatsimmi malittarisassat malillugit kinguartitsisimasut sakkutuujusussaajunnaartinneqarsinnaapput. 2018-2023-mi illersornissaq pillugu isumaqatigiissummik tamanna piviusunngortitsineruvoq.

Sakkutuujusussaataanermit inatsit sakkutuujusussaataasut sakkutuujunissaminnut aggersarneqarsimasut killilimmik sakkutuujusussaanut kinguartinnissaannut periarfissiivoq.

Aammattaaq sakkutuujusussaataasut atukkaminnut qanigisaasaluunniit atugaannut pingaaruteqarluinnartuusoq uppersarsinnaagunikku tamakkiisumik sakkutuujusussaajunnaarsinneqarsinnaapput.

Allannguutit uku tunngavigalugit sakkutuujusussaaneq pillugu inatsisip nunatsinnut atuuttup iluarsaannissaa kissaatigineqartoq nalilerneqarpoq, nunatsinni sakkutuujusussaasut taamaalillutik Danmarkimi Savalimmiunilu sakkutuujusussaasut atugaasa assiginik atugaqalissapput.

Taamatut oqaaseqarlunga Naalakkersuisut sinnerlugit immikkoortoq Inatsisartuni suliassanngorlugu tunniuppara.